

**Преставление (1833), второе обретение мощей (1991)
прп. Серафима, Саровского чудотворца**

На Велицей вечерни.

Блажен муж:

На Господи возвах, *стихиры на 8.*

Аще убо есть предпразднство святых Богоявлений, первое поем три стихиры предпразднства: аще же несть сия стихиры, повторяюще первую и вторую, во глас 1: Подобен: О, дивное чудо:

О, преславное чудо,/ подвижник благочестия в Сарове является,/ и моли́твенник к Богу теплый Серафим пречудный нам бывает:/ веселися, обитель Саро́вская,/ имущи в себе мощи преподо́бнаго:/ възиграйте, православных множества,/ предивнаго Серафима имуще в бедах заступника и вопиюще к нему́:/ радуйся, свети́льниче Росси́йския земли́,/ тмы сопротивных далече отрева́й/ и Господеви моли́ся, // даровати душам нашим мир и велию милость.

О дивное чудо,/ се бо воистинну во обители Саровстей/ благоче́стия столп непоколебимый/ Серафим блаже́нный явля́ется нам:/ темже, богомудрых собо́ри,/ на высоту́ духом возносите́ся,/ к преподо́бному вопиюще:/ преподобне отче Серафа́ме,/ Господеви моли́ся, // даровати душам нашим мир и велию милость.

Дивны Твоя тайны, Христе Бо́же,/ яко даровал еси нам свети́льника преподобнаго Серафима,/ верным людем на сопротивныя крепкаго поборника,/ иноком и всем православным христиа́ном моли́твенника,/ святе́й обители похвалу и утвержде́ние:/ той и ныне молит Тя, Го́споди, // даровати душам нашим мир и велию милость.

Егда вшел еси, преподобне, в пустыню Саровскую, тогда, своя воли до конца совлекся, твердое ко всем послушание показал еси: досады бо и безчестия претерпел еси радуяся: ударения и раны от злых человек приял еси, о нихже и молился еси, преподобне: мы же, прославляюще пречестную память твою, молим ти ся, преподобне, Господеви молися мир мирови даровати и душам нашим велию милость.

Блаженна обитель Саровская, имуще тебе,/ преподобне отче Серафиме,/ добродетелей сокровище, сосуд чистоты,/ целомудрия хранителя, приятелище благодати,/ источник исцелений, болящим врача безмездна,/ постника истинна, в скорбех утешителя,/ житейскими страстьми обуреваемым тихое пристанище:/ нам же, творящим честную память твою,/ моли, преподобне отче Серафиме, // даровати мир и велию милость.

Днесь ликуют собори верных в па́мь твою,/ преподобне Серафиме,/ и велегласно вопиют:/ ты любве ради Христовы вся красная мира оставив/ и в пустыню Саровскую вселився,/ никакоже устрашился еси невидимых враг борения:/ но сия́ молитвами твоими яко прах отмета́л еси:/ темже Господеви моли́ся // даровати душам нашим мир и велию милость.

Слава, глас 8:

Приидите, верных собо́ри,/ похвальными песньми днесь пречуднаго отца прославим/ и сице ему́ возопиим:/ преподобне отче Серафиме,/ воистинну сподобился еси божественныя жизни,/ прием от Бога венец нетле́нныя сла́вы./ Сего ради обитель Саровская тобою хвалится,/ людие же, зряще честную раку мощей твоих/ и чудеса бываемая, славят прославляющаго тя Господа:/ Емуже моли́ся, преподобне, // даровати душам нашим мир и велию милость.

И ныне, предпразднства, или Богородичен, глас тойже:

Царь Небесный/ за человеколюбие на земли явися,/ и с человеки поживе:/ от Девы бо Чистыя плоть приемый,/ и из Нея прошедый с восприятием:/ един есть Сын, сугуб естеством,/ но не ипостасию./ Темже совершенна Того Бога,/ и

совершенно Человека воистинну проповедающе,/ исповедуем Христа Бога нашего:/ Егоже моли Мати Безвестная,// помиловатися душам нашим.

Вход. Прокимен дне.

Чтения преподобническая 3.

На литии

стихира храма: И преподобному стихиры, глас 1:

Киими похвальными венцы венчаим подвижника великаго, преподобнаго Серафима? Той бо яко наставник добрый в твердости веры и добродетели явися, богодухновенными учении и равноангельным житием приходящия к нему научая. Темже вопием ему: молися, преподобне, Христу Богу, православную веру утвердити и душам нашим спастися.

Приидите, инок множества, днесь преподобнаго благочестно восхвалим, истиннаго ученика Спасова, мирскую прелесть поправшаго, ярем Христов на рамо взявшаго, и полки бесов посрамившаго: к немуже возопиим сице: не забуди нас, отче Серафиме, восхваляющих и чтущих святую память твою.

Светлая и божественная память твоя, преподобне Серафиме, удиви всех, яко безплотен бо, во плоти враги невидимыя посрамил еси: вся же страна Тамбовская и святая обитель Саровская, имущи твоя святыя мощи, хвалится, сими бо здравие всем с верою притекающим к честней твоей раце подается. Темже, просветившися тобою, вопием ти, преподобне: моли спастися душам нашим.

Слава, глас 5:

Радуйся днесь, вся Российская земле, и святая обитель Саровская, веселися. Верных же множества, стекшеся днесь, прославим преподобнаго отца, пастыря и учителя, богомудраго наставника заблуждшим, скорого всех болящих целителя, Российския земли великое украшение, егоже похваляюще сице рцем: преподобне Серафиме, спаси нас молитвами твоими.

И ныне, Богородичен, глас тойже:

Храм и дверь еси, палата и престол Царев, Дево Всечестная, Еюже Избавитель мой Христос Господь, во тьме спящим явися, солнце сый правды, просветити хотя, яже созда по образу Своему рукою Своею: темже, Всепетая, яко матерне дерзновение к Нему стяжавши, непрестанно моли спастися душам нашим.

На стиховне

стихиры, глас 5.

Подобен: Радуйся, живоносный Кресте:

Радуйся, ангелом собеседниче, преподобне Серафиме, благочестно бо на земли пожив, многи приходящия к тебе страху Господню поучал еси: благодатию Пресвятаго Духа озаряемь, зрел еси будущая, яко настоящая, и умиления и радости многи скорбящия душею исполнял еси. Темже молим ти ся, молися Господеви о чтущих тя.

Стих: Честна пред Господем/ смерть преподобных Его.

Радуйся, заблуждших учителю предивный, Христа Господа во храме со архангелы и ангелы видети сподобивыйся. И ныне, преподобне, на небесех Того зрения выну наслаждаяся, молися о нас, верою творящих память твою.

Стих: Блажен муж бояйся Господа, в заповедех Его восхощет зело.

Радуйся, преподобне Серафиме, всем бо хранити истинную веру Христову заповедал еси, и вышняго жития вожделев, богатство возненавидел еси: ныне же неизреченную красоту небесную зриши, и сладкаго пения ангельскаго наслаждаешися. Темже молися Господеви даровати нам мир и велию милость.

Слава, глас 6:

Преподобне отче Серафиме, кто исповесть труды твоя и болезни, или кий язык изречет жестокое пустынное твое житие, бдение же и пощение, еще же и в затворе пребывание, устен безмолвие и моление непрестанное? Воистинну явился

еси постником украшение, молитвенник к Богу непостыдный. Темже к тебе вопием: радуйся, иноческаго жития правило: радуйся, в бедах и скорбех великое утешение и теплый всем предстателю: молися, преподобне, спасися душам нашим.

И ныне, предпразднства, или Богородичен:

Творец и Избавитель мой Пречистая, Христос Господь из Твоих ложесн прошед, в мя оболкийся, первыя клятвы Адама свободы. Темже Ти Всечистая, яко Божии Матери же и Деве, воистинну вопием немолчно: радуйся ангельски, радуйся Владычице, предстательство и покрове, и спасение душ наших.

Тропарь преподобнаго, глас 4:

От юности Христа возлюбил еси, блаженне,/ и Тому́ единому работати пламенне вожделёв,/ непрестанною молитвою и трудом в пустыни подвизался еси,/ умилённым же сердцем любовь Христову стяжав,/ избранник возлюблен Божия Матере явился еси./ Сего́ ради вопиём ти:// спасай нас молитвами твоими, Серафиме, преподобне отче наш.

Дважды, и предпразднства, или Богородице Дево:

На Утрени.

На Бог Господь, тропарь святаго, дважды. Слава, и ныне, предпразднства, или Богородичен: Еже от века утаенное:

Таже степенна, 1-й антифон 4-го гласа.

Прокимен, глас тойже: Честна пред Господем/ смерть преподобных Его.

Стих: Что воздам Господеву о всех, яже воздаде ми?

Евангелие от Матфея, зачало 43. [Мф. 11, 27–30.]

По 50-м псалме стихиры, глас 6:

Днесь, вернии, духовно торжествующе/ в нарочитом празднице преподобнаго отца,/ и благочестно радуящеся, тому тёпле возопиём:/ радуйся, Серафиме блаженне:/ радуйся, небесный человек и земный ангеле:/ радуйся, многих на путь спасения наставивый:/ радуйся, верным похвало и Российстей земли утверждение:// молися о душах наших.

Канон предпразднства на 6, аще же несть предпразднства, канон Богородице параклисис, со ирмосом на 6, и святому два канона на 8.

Канон первый, глас 6.

Песнь 1.

Ирмос: Яко по суху пешествовав Израиль по бездне стопами, гонителя фараона видя потопляема, Богу победную песнь поим, вопияше.

Катавасия по Уставу.

Песнь 3.

Ирмос: Несть свят, якоже Ты, Господи Боже мой, вознесый рог верных Твоих, Блаже, и утвердивый нас на камени исповедания Твоего.

Песнь 4.

Ирмос: Христос моя сила, Бог и Господь, честная Церковь боголепно поет взывающи, от смысла чиста о Господе празднующи.

Песнь 5.

Ирмос: Божиим светом Твоим, Блаже, утренюющих Ти души любовью озари, молюся, Ты ведети, Слове Божий, истиннаго Бога, от мрака греховнаго взывающа.

Песнь 6.

Ирмос: Житейское море воздвигаемое зря напастей бурей, к тихому пристанищу Твоему притек, вопию Ти: возведи от тли живот мой, Многомилостиве.

Кондак, глас 2:

Мира красоту и яже в нем тленная оставив, преподобне,/ в Саровскую обитель вселился еси:/ и тамо ангельски пожив,/ многим путь был еси ко спасению:/ сего́

ради и Христос тебе, отче Серафиме, прослави, / и даром исцелений и чудес обогати. / Темже вопиём ти: // радуйся, Серафиме, преподобне отче наш.

Песнь 7.

Ирмос: Росодательну убо пещь содела ангел преподобным отроком, халдеи же опаляющее веление Божие мучителя увеща вопити: благословен еси, Боже отец наших.

Песнь 8.

Ирмос: Из пламене преподобным росу источил еси и праведнаго жертву водою попалил еси: вся бо твориши, Христе, токмо еже хотети, Тя превозносим во вся веки.

Песнь 9.

Ирмос: Бога человеком невозможно видети, на Негоже не смеют чини ангельстии взирати: Тобою же, Всечистая, явися человеком Слово воплощено: Егоже величающе, с небесными вои Тя ублажаем.

На хвалитех стихиры на 6, предпразднства 3 и преподобному 3. Аще же несть предпразднства, преподобному на 4, глас 8:

Приспе всечестный праздник обители Саровския, память преподобнаго Серафима, емуже ныне сице возопиим: радуйся, постником светило и утверждение, иноком звездо, якоже волхвом, показующая путь в небесныя обители, священником похвало преславная, любви и целомудрия источниче неизсякаемый, светильниче пресветлый духовнаго разсуждения: радуйся, правило добродетелем великое. [Дважды.]

Блаженне отче Серафиме, Христови воистинну последовал еси, братолюбием и незлобием всех к себе привлекая, кротостию же и смирением многи добродетельному пути научая. Темже любовию память твою, преподобне Серафиме, ублажаем.

В пустыню вселился еси, преподобне, и тамо исполнился духовныя премудрости, на высоту добродетели возшел еси. Темже вопиём ти: радуйся, церковное украшение, священником доброе утешение, иноком благолепие и похвало, Серафиме блаженне: моли Христа Бога мир вселенней даровати и душам нашим велию милость.

Слава, глас 6:

Приидите иноков собори и постников сословие, приидите христоименитых людей множества, песньми истиннаго постника почтим, вопиюще: радуйся, по стопам Владыки Христа узким путем управляемый, и притекающим к тебе в бедах и скорбех скорый помощниче, и спасения ходатаю предивный: радуйся, даром пророчества украшенный, прорицай яко настоящая грядущая: молися, преподобне Серафиме, о чтущих верою и любовию святую память твою.

И ныне, предпразднства, или Богородичен:

Богородице, Ты еси лоза истинная, возраставшая нам Плод живота: Тебе молимся, молися, Владычице, со святыми апостолами, помиловати души наша.

Славословие великое, и отпуст.

На Литургии.

Блаженны от канона перваго песнь 3-я, и втораго канона песнь 6-я.

Прокимен, глас 7: Честна пред Господем смерть преподобных Его.

Стих: Что воздам Господеву о всех, яже воздаде ми?

Апостол к Галатам, зачало 213. [Гал. 5, 22 – 6, 2.]

Аллилуиа: Блажен муж бояйся Господа:

Евангелие Луки, зачало 24. [Лк. 6, 17–23.]

Причастен: В память вечную будет праведник: